



Kaspi Bank  
арқылы жазылу

Облыстық қоғамдық-саяси газет

# МАҢҒЫСТАУ

1973 жылдың 13 сәуірінен шыға бастады



mangystaumedia.kz  
otpannews.kz

№52-53 (10453) 10 шілде, бейсенбі, 2025 жыл



## Әр тамшының тағдырын таразылайтын уақыт туды

Қазақстандағы ең өзекті мәселелердің бірі – су тапшылығы, әсіресе ауылдық аймақтарда ауыз суға қатысты түйткілдер әлі де жиі кездеседі. Бұл тек инфрақұрылым жайы емес – бұл елдің ұлттық қауіпсіздігіне тікелей қатысты мәселе екенін Мемлекет басшысы Қасым-Жомарт Тоқаев су шаруашылығы қызметкерлерін құттықтау сәтінде айрықша атап өтті.

«Халқымыз «судың да сұрауы бар» деп бекер айтпаған. Әр тамшының қадірін білген» дей келе Қасым-Жомарт Кемелұлы барша жұртты суды үнемдеуге, өскелең ұрпақты жастайынан судың құндылығын білуге, ысырап етпеуге шақырды.

Президент нақты деректерге сүйене отырып, 500-ге жуық ауылға ауыз су тарту – шұғыл міндет екенін мәлім етті. Қазірдің өзінде қала және ауыл халқының көп бөлігі таза сумен қамтамасыз етілген. Десе де бұл мәселенің түп-тамыры тереңде. Судың жетіспеуі тіршіліктің, экономиканың, ауыл өмірінің тұралуына әкелетіні жасырын емес. Сондықтан да Мемлекет басшысы: «Суды тиімді пайдалану – өте өзекті мәселе» дей отырып, «Шыңырау» повесін мысалға келтірді. Расында да, Әбіш Кекілбаевтың сол бір туындысындағы құдық қазушы бейнесі бүгінгі су үшін күресіп жүрген әр азаматтың символы десек болады.

Қазірдің өзінде 470 мың гектар жерге су үнемдейтін технологиялар енгізілген, ал оны пайдаланатын шаруаларға шығынның 80%-ына дейін өтеу қарастырылып отыр. Бұл – су мәселесіне мемлекеттік деңгейде берілген ерекше назар мен нақты қолдаудың көрінісі. Бұрынғы «көп пайдалансаң – көп төлейсің» дейтін жүйе енді «аз пайдалансаң – аз төлейсің» деген тиімді, үнемшіл қағидамен алмастырылды.

Шын мәнінде, бүгінде су – тек табиғи ресурс емес, елдің тірегі, мемлекеттің болашағы. Су мәселесін шеше алған ел ғана экономикасын тұрақтандырып, әлеуметтік әл-ауқатын жақсарту алады. «Су – өмірдің өзегі» деген бұрынғы тәмсіл қазір ұлттық стратегиялық ұстанымға айналуда.

Ендігі жерде әр тамшының тағдырын ұмытпай, тіршілікті судай таза ұстаныммен сақтап қалу – барша елдің міндеті.

## КАСПИЙДІ САҚТАУ – БОЛАШАҚТЫ САҚТАУ

Президент Каспий теңізі мен Балқаш көліне, Кіші Арал тағдырына алаңдау – ұлт болашағына алаңдаудың айқын көрінісі екенін айтты. Бұл жай ғана табиғат объектілері емес, олар – елдің тынысы, экожүйенің тірегі, халықтың аманаты. Мемлекет басшысы «Су дұрыс пайдалана білсең – құт, ысырап етсең – жұт» деп, халық даналығын дәп келтіріп айтты. Осы бір сөздің астарында ғасырлық гибрат, бүгінгі мен болашақ үшін салынған салмақ бар.

Кіші Аралдың тағдырын тилге тиек еткен Мемлекет басшысы жылдар бойы жүргізілген жүйелі жұмыстың арқасында теңіз қайта оралып, айдыны суға толғанып айтты. Бұл – адам қолымен жасалған нағыз керемет, елге деген адал еңбектің шынайы жемісі. Ендігі міндет – Каспий мен Балқашты да сол жолмен сақтап қалу, көздің қарашығындай қорғау. Каспий теңізі, Балқаш көлі, жалпы ел аумағындағы барлық су көздері – бұл тек табиғи нысандар ғана емес, халықтың тіршілігіне, ұлттық қауіпсіздікке, экологиялық тепе-теңдікке тікелей әсер ететін аса құнды байлықтар. Сондықтан оларды сақтап қалу – бүгінгі буынның ғана емес, болашақ ұрпақтың да алдындағы үлкен жауапкершілік. Қазірдің өзінде климаттың өзгеруі, антропогендік қысым мен бейберекет пайдалану салдарынан еліміздің басты су қоймалары экологиялық дабыл қағып тұр. Каспий теңізінің тартылуы, Балқаш көліндегі су деңгейінің тұрақсыздығы – тек табиғи құбылыс емес, сонымен бірге адамзат әрекетінің салдары. Егер біз қазірден бастап нақты, ғылыми негізделген, нәтижеге бағытталған шешімдер қабылдамасақ, ертеңгі күні кеш болуы мүмкін.

Тоқаевтың мәлімдемесі нақты шаралар қабылдауға, су ресурстарын тиімді әрі ұқыпты пайдалануға әкелуі тиіс. Сондай-ақ жағалаулардағы заңсыз құрылыс пен өндірістік ластануға тосқауыл қою, суды үнемдеу технологияларын кеңінен енгізу, халық арасында судың қадір-қасиетін түсіндіру жұмыстарын жүргізу, сондай-ақ халықаралық деңгейде көршілес мемлекеттермен ортақ келісімдерге келіп, ортақ ресурстарды әділ әрі тұрақты басқару суды сақтау мен табиғи экожүйені қалпына келтірудегі ең маңызды әрі кезек күттірмейтін стратегиялық міндеттердің бірі болып саналады.

Қасым-Жомарт Тоқаев Қазақстанның елдің су шаруашылығын дамытуға және халықты ауыз сумен қамтамасыз етуге қосқан елеулі үлесі үшін бір топ азаматты мемлекеттік наградамен марапаттады. Мерейлі сәтке қатысып, III дәрежелі «Еңбек Даңқы» орденімен марапатталғандар қатарында жерлесіміз, Жаңаөзен қаласының тұрғыны, «Өзенинвест» МКК бас инженері Қапарбаев Мергенбай Дәулетбайұлы да бар.

Өз тілшіміз.

## МЕМЛЕКЕТ БАСШЫСЫ ЖАҢАӨЗЕНДІК ИНЖЕНЕРДІ МАРАПАТТАДЫ

ҚР Президенті Қасым-Жомарт Тоқаев «Өзенинвест» мекемесінің бас инженері Мергенбай Қапарбаевты еліміздің су шаруашылығы саласының дамуына елеулі үлес қосқаны үшін III дәрежелі «Еңбек Даңқы» орденімен марапаттады.

Мергенбай Қапарбаевтың су шаруашылығы саласындағы еңбек өтілі 29 жылдан асады. Еңбек жолын 1984-1985 жылдары токарь маманы болып бастаған ол өз ісін жетік білетін, тәжірибелі маман ретінде танылды. Жаңаөзен қаласы әкімдігінің шаруашылық жүргізу құқығындағы «Өзенинвест» мемлекеттік коммуналдық кәсіпорынның инфрақұрылымын дамыту мен жаңғыртуға еселі еңбек сіңірді.

Мергенбай Дәулетбайұлы ұжымда ұтқыр ұйымдастырушылық қабілетімен, инженерлік құрам қызметін тиімді үйлестіру, қызметкерлерді оқыту мен біліктілігін арттырудағы жаңашылдығымен ерекшеленді. Жаңаөзен қаласының дамуына сүбелі үлес қосқан қызметкер, қабілетті ұйымдастырушы, еңбек озаты, жұмыста бірнеше жас маман дайындаған білікті маман. Су шаруашылығы қызметкерлерінің кәсіби мерекесінде мемлекеттік награда алған жаңаөзендік маманның жұмысына табыс тілейміз.

Өз тілшіміз.

## ҚЫСҚА-НҰСҚА

### МАҢҒЫСТАУДА ҚУАТЫ 160 МВТ БОЛАТЫН БУ-ГАЗ ҚОНДЫРҒЫСЫ САЛЫНАДЫ

Маңғыстау атом энергетикалық комбинаты мен Қытайдың «Huadian Kazakhstan Energy» компаниясының бірлескен «Ақтау энергетикалық компаниясы» кәсіпорны аясында қуаты 160 МВт болатын бу-газ қондырғысы салынады. Құрылыс жұмыстары аяқталған соң қондырғы толығымен «МАЭК» басқаруына өтеді. Қазіргі таңда нысан құрылысына қажетті жер телімі бөлініп, құрылыс басталып кеткен.

### ЖЫЛ БАСЫНАН 10 МЫҢҒА ЖУЫҚ АДАМҒА АТАУЛЫ КӨМЕК ТАҒАЙЫНДАЛДЫ

Маңғыстау облысында биыл үшінші тоқсанның қорытындысы бойынша атаулы әлеуметтік көмек 1 734 отбасына, яғни 9 413 адамға тағайындалды. Облыс халқының әлеуметтік осал топтарына жататын азаматтарды әлеуметтік қорғау мақсатында жергілікті атқарушы органдардың шешімімен 1 910 адамға біржолғы әлеуметтік көмек көрсетілді.

### СҰЙЫТЫЛҒАН ТАБИҒИ ГАЗ ЖӘНЕ МЕТАНОЛ ӨНДІРЕТІН ЗАУЫТТАР АШЫЛАДЫ

«Condor Energies» халықаралық энергетикалық компаниясы Қаракия ауданының Құрық порты маңында жылына 145 мың тонна сұйытылған табиғи газ өндіретін зауыт салуды жоспарлап отыр. Жалпы аумағы 16 гектарды құрайтын бұл жоба 2027 жылы іске қосылады деп күтілуде. Зауыттың құрылысы кезеңінде 300 адам жұмыспен қамтылып, пайдалануға берілгеннен кейін 100 тұрақты жұмыс орны ашылмақ.



## Маңғыстау Абай еліне тарту жасайды

Абай облысына Маңғыстау жұртшылығы зор рухани тарту жасамақ. Қазіргі таңда Маңғыстау облысы Абай жерінде Достық үйін салып беруді өз міндетіне алып отыр. Бұл бастама – ел ішіндегі бірліктің, бауырмалдықтың және өңіраралық ынтымақтастықтың нақты көрінісі. Жоба аясында бой көтеретін Достық үйі – тек әкімшілік ғимарат емес, ұлттық мәдениеттер мен этносаралық татулықтың алтын ордасы болады. Мұнда түрлі ұлт пен ұлыс өкілдерінің мәдени іс-шаралары, кездесулері, форумдары ұйымдастырылып, елдің тұтастығын нығайтуға үлес қосады. Маңғыстау – бірлік пен берекенің өлкесі. Бұл жолғы тарту – алыстағы Абай еліне жасалған туыстық пейіл мен бауырластық көңілдің белгісі. Рухани үндестікпен жасалған бұл игі іс – қос өңір арасындағы байланысқа жаңаша серпін бермек.

Жалғасы 2-бетте >>>


## БҮГІНГІ САНДА

### ХАЛЫҚТЫ УЛЫ КӨЛДЕН СЕКСЕУІЛ ҚҰТҚАРА МА?



4

### ЖАЗДА МАҢҒЫСТАУДА ҚАЙДА ДЕМАЛУҒА БОЛАДЫ?



16